

Äschewolk am Himml

Was mer nit alles heert, gsieht un zu gspierte kriet in dem Lewe! Mer hat jo schun in der Schul gelehrt, dass e Vulkan ausbreche tut. Was awer vor unlängscht in Island passiert is, also der Vulkanausbruch, der hat ganz Europa un die weiti Welt dorchnaner gebrung. Es is gsaat gin, dass der Raach, Staab oder die Äsch vun dem Vulkan als Wolke iwer Europa gschwebt is un dass des arich gfährlich war, for die Fliegre, die hätte do nit so mir nix dir nix dorch die Äschwolk fliehe kenne, ohne Gfahr zu sin, dass se absterze.

Un somit han alli (oder die meischte) Flughäfen in Europa ihre Aktivität ingstellt un des ganz pletzlich. Die Leit, die wu vun weitem (saa mer mol aus Afrika) kumm sin, die han in irgendeem Flughafen ghuckt un gewart, dass se an ihre Ziel kumme kenne. Des is jo nor e Beispiel. Un villi Leit han nimi weiter gewisst, sie han vleicht nitemol Geld ghat for ihre Dorscht un Hunger stille, gschwer noch for in eem Hotel iwarnachte. Es sin Feldbetter ufgstellt gin, dass die Leit sich wenschtens ausstrecke han kenne. Un Wasser un Brot is ach verteelt gin.

Un vun der Wolke aus Äsch war ach ich betroff. Was ich wieder in dem Deitschland gsucht han, des han ich mich paarmol gfroot, wie ich mit uffnem Maul jedi Stund die Nachrichte ghorcht un gedenkt han: also, die Wolk muss doch endlich waiche, dass ich hem fliehe kann. Mei Ticket han ich jo ghat, es is angsaat gin, dass mer a umbuche kann, wann die Gfahr voriwer is. Doch an dem Stuttgarter Flughafen han ich anrufe kenne, sovill wie ich gewillt han, es hat niemand abghob. War jo irgendwie verständlich, weil in dergleich Situation misse jo stark vill Leit gewenn sin.

Mir hat de Bode uner die Fiess gebrennt, ich han hem misse un wille. Zum Glick han ich e Familie aus Temeschwar erwischt, die ware mit ihrem Auto uf Bsuch bei Freind. Un die han sich angebot, mich mit hem zu holle. So sin ich dann wieder derhem geland. Es war mer eigentlich recht so, weil bissl gfercht han ich mich schun vor em Flug. Weil es git nit alli Fliegre vorbot zu fliehe, wann ke Gfahr is!

Adje Baschtl, Gretl gsiehscht mich nimi!

Doneilich war mol wieder der Tach, an dem unser Briefträger mit der Pension hat kumme selle. Die Leit aus unsrem Block han sich jo for de Tach nix vorgholl, weil erschtens han se ke Geld me ghat for Inkaafe gehn un zweitens hats Haigawle gereent. Ja, un wies mol geger de spode Nohmittach gang is un die Pension war noch immer nit do, jetz sin die Leit ungewillich gin un han gruppenweis im Treppehaus gstann for kummentiere. Weil des is noch nit vorkumm, dass der Briefträger sich dermassen verspäte tut. Un geger Owet wars dann soweit, dass e Zetl am Eingang gepickt hat, dorte druf war gschrieb: Briefträger iwerfall, Geld futsch! Un mer hat ach schun bei de Nachrichte gheert un gsiehn, was passiert is. Der Mann war mit em Bizikl unerwechs, hat die Taschka mit 40 000 Lei umhänge ghat. Do is ufmol e Motorrad langscht ne gerast, dorte ware zwaa Maskierti druf un eener hat em die Taschn mit dem Geld erwischt – sie han Gas gin un adje Baschtl, Gretl gsiehscht mich nimi. Nor gut, dass zwaa anri Männer des alles vun weitem beowacht un Zeije abgin han. Jetz ware manchi Leit dischperat, eener hat dem anre Geld gelehnt, ich denk, es is kenner hungricher schlofe gang. Un drei Täch dernoh is die Pension dann doch bei de Leit ingetroff, die Raawre hat mer awer noch nit feschtghol.